

Causa Phæ-
nom. VIII.

ròque comminui constat, idque impune ac sine læsione fieri mirum esse non debet, quia pressæ illæ particulæ mucronatæ rigore suo & integritate carent, facileque adeò in seipsas concedunt: quemadmodum certè supra gladium in plura frustra vix levi contactu cohærentia contractum prono pectore quis absque omni vulnerationis metu incumberet.

Causæ 2.
Part. Phæn.
V.

CONCLUSIO XVIII. Tuberculos denique illos in flexura lachrymarum interna conspicuos exinde verosimiliter deduxit *Montanarius*, quòd inflexio illa sub aquis contingat cum exterior superficies jam incepit frigere & aliquantulum indurari, ut postmodum in flexionem illam non æquè facile, ac internæ partes adhuc molles, valens consentire, plicaturam illam extrorsum faciat; maximè (quod haut inutiliter forsan addimus) quia guttæ caput uti priùs mersum, ita priùs etiam extus saltem induratum, notabiliùs illi flexuræ resistit, partemque adeò desuper pressam extrorsum concedere tantò magis cogit. Ipsius incurvationis causam autem dum investigatu multò difficiliorem judicat Vir laudatus, interea proprio experimento factarum, in vase vitreo aquâ pleno, guttarum testatus, illam incurvationem ordinariè tum demum contingere, cum vasis fundum attigerit lachrymæ caput; haut absque ratione fortè quis crederet, inde rem omnem pendere, quòd, quamdiu lachryma per aquam liberè descendit, antecedente capite & caudâ sequente, hæc ab ambiente aqua æqualiter undique premente necessariò directè teneatur; ubi primùm autem ad vasis fundum tantisper allisum caput ejus fuerit, per aliquam motûs reflexionem, quæ insimul ob inæqualitatem fundi à perpendiculo facillimè in unam aut alteram partem inclinēt, alterutra caudæ facies in obnitentem desuper aquam paulò magis impingat, eoque pacto in partem oppositam flecti se ob mollitiem suam patiatur.

TENTA-